

HE MIHANA KI ETAHI PARIHA MAORI.

Ki te Etita o Te Toa Takitini.

HE panui atu tena ki nga tangata katoa o te taha Maori o te Hahi kia mohiotia ai nga pariha, me nga ra, e whakahaeretia ai i tenei tau te mahi e kiia nei *he Mihana*: he tono atu hoki kia mahara tena, tena, ki te inoi tonu ki te Atua kia manaakitia nuitia e Ia te kai-kauwhau me nga tangata o ia pariha o ia pariha. Me kore hoki te manaaki a te Atua ka kore he hua pai o te mahi.

He mea nui, he mea tapu, te mihana. He whakaeke i te ngakau tangata ki te taumata e tika ai kia puta ki a ia te ora, te marama, te kaha, te koa, te rangimarie, me te tapu o te Atua Matua, Tama, Wairua Tapu: he whakahou i te ngakau mate hei ngakau ora, i te kanohi pouri hei kanohi kite, i te taringa turi hei taringa rongo: he whakanui i te whakapono o te hunga whakapono.

He tikanga tawhito tenei i nga pariha pakeha, he tikanga e whai ana kia whiwhi te tangata ki te ora mona, ki tona nui noa atu hoki.

Ma te mohio o te tangata ki tona mate ka hiahia ai ia ki te rongoa: ma te rongoa ki te rongoa, me te whakaae a ngakau ki taua rongoa, ka ora ai ia i ona mate.

Na reira kia kaha ki te inoi atu moku kia maia ai, kia marama ai, te puaki a toku mangai i nga kupu a te Atua: kia tau nui te Wairua Tapu ki runga i ahau hei whakakaha i ahau—i toku tinana me toku Wairua. Kia mahara hoki ki te inoi mo te iwi kainga me te pariha katoa, kia tukua e te Atua tona Wairua Tapu ki runga i te katoa i tenei wa kia huri nui ai te ngakau ki te whakapono ki a ia, kia piri pono ai, kia u ai ki roto ki a te Karaiti me Ia hoki ki roto i a ratou. I runga i te tono a te Pihopa ratou ko te minita o te pariha, me te hunga o te Hahi, kua whakaritea enei Mihana e whai ake nei hei mahi maku i tenei tau.

1. Pariha o Taupo.—Oketopa 31 ki Noema 9, ki Waipahihi.

2. Pariha o Te Puke.—Noema 21 ki 30, ki Te Matai.

3. Pariha o Whakatane.—Tihema 5 ki 14, ki Te Pahou.

He mahi nui, he mahi taumaha, enei: e kore hoki e taea i runga i te kaha tangata.

No reira kia kakama koutou katoa ki te awhina ki te tautoko i te kai-mahi. a i ia ra, i ia ra, kia puta he inoi ma koutou mo nga manaakitanga a te Atua kia tau iho ki nga Mihana.

Heoi ano.

—*Na Te Wiremu.*

Te Aute, Pukehou. H.B.